

Amos

Ora ku Israel, e reino di nort, a bira un nashon, nan a bandoná Dios, i a bai tras di religion falsu, bisio i piká. Dios, den Su pasenshi, a hasi maksimo esfuerso pa konsientisá Israel ku nan mester repentí i bolbe serka djE.

Ta parse ku e religion di Israel tabata un forma di sinkretimso. Nan a adorá e Dios di Israel ainda huntu ku e dios pagano, Baal. E religion di Baal a enkurashá dekadensia moral, debí ku adorashon di e dios pagano a inkluí hopi inmoralidat (prostitushon sagrado), violensia i buracheria. Huntu ku esei, e adorashon di Dios a para bira solamente un kustumber i rito. Nan a ofresé sakrifisionan keriendo ku nan lo haña nan gana serka Dios. Masha poko hende di Israel di bèrdat a keda fiel na Dios. Poko tabata esnan ku a hiba bidanan santu dilanti Dios.

Dios a disipliná nan, pèrmitiendo nan pa pasa den tempunan duru. Kada ratu nan tabatin guera. Nan a eksperensia poko era di pas. Ma tòg nan a nenga repentí.

Anto, komo un esfuerso pa trese nan na repentimentu, Dios a basha bendishon riba nan nashon durante reinado di Jeroboam II. Esaki tabata un era di prosperidat i pas, un era di kua Jonas a profetisá (2 Reinan 14:25). Ma apesar di Dios Su bondat, Israel tòg a nenga bolbe na Señor! En bèrdat, nan a desviá mas leu for di Dios.

Religiosidat, inmoralidat, i un aktitut di komplasensia i independensia a kompañá e prosperidat material. Idolatria, hipokrisia, dekadensia moral, i inhustisia sosial tabata tur kaminda. Korupshon tabata un plaga. Rikunan a probechá di e pobernan pa haña mas rikesa. Nan a bende nan komo katibu pa akumulá mas rikesa. Kunukeronan riku a kita kunuku di kunukeronan pover. Rikunan a bira mas riku i pobernan a bira mas pover.

E kopa di Dios Su rabia pa motibu di e piká di Israel tabata yena. Dios tabata kla pa kastigá nan. Solamente si nan repentí lo nan skapa e kastigu severo di Dios.

Den e era aki, Dios a manda un profeta úniko pa spierta Israel di e kastigu severo pendiente...pa duna nan un *chens mas pa repentí!* E persona ku Dios a manda tabata un hòMBER ku El a prepará spesial pa e tarea aki... Amos!

I. OUTOR DI E BUKI

Mas ku ún persona den Beibel tabatin e nòmber Amos. Pues ta bon pa klaria ku esaki no ta e Amos di 2 Reinan 20:1 (tata di Isaias) ni tampoko e Amos menshoná den Lukas 3:25. Sin duda e buki di Amos ta karga nòmber di e profeta Amos, un profeta ku no ta menshoná—ni sitá—ningun otro kaminda den Beibel.

Ma profeta Amos mes a skirbi e buki òf un sekretario (manera Baruk a hasi pa profeta Jeremias)? Maske no ta pusibel pa kontestá e pregunta aki konklusivamente, no tin indikashon ku un sekretario a skirbi e buki. Alkontrario, diferente biaha e teksto ta usa e palabra “mi” (p.e. 5:1; 7:1-9; 8:1; 9:1), talbes indikando ku ta Amos mes a skirbié.

Ma ken ta e profeta Amos? Kiko nos sa di dje?

A. NÒMBER DI OUTOR

E nòmber Amos ta bin di e palabra hebreo AMAS, ku ta nifiká “pa hisa òf karga un karga” òf “pa karga”. Pues, Amos ta nifiká “kargadó di karga”.

B. BIDA DI OUTOR

Nos sa nada di Amos su niñes ni di su mayornan. E echu ku nòmber di su tata no ta mensioná por indiká ku Amos lo no a bin di un famia renombrá.

Amos tabata habitante di Tekoa (1:1), un puebilto chikitu 16 kilometer sùit di Jerusalèm, 8 kilometer sùitost di Bètlehèm, den e serunan seku di Juda, 24 kilometer pabou di Laman Morto. Esaki t’e mésun sitio unda David a kuida su karnénan, i unda el a hui i skonde di rei Saul.

Maske Amos tabata di pais di Juda, Dios a mand’é pa profetisá na Israel, e pais di nort (1:1; 7:15). Pusíbelmente Amos a prediká na Juda i asta na otro nashon tambe, ma Beibel ta duna ningun indikashon si esei tabata e kaso.

E storia den Amos 7:10-15 ta laga sa kiko Amos su trabou tabata. Dios a manda Amos pa bai Bèt-èl, e sentro di idolotria na Israel (e lugá prinsipal pa adorá e dios-bisé di oro). Ora Amasias, un saserdote di e religion di idolotria, tabata ke kore ku Amos, Amos a respondé “mi no ta profeta”. Amos no a wòrdu ungi ofisialmente komo un profeta. E no a wòrdu ordená dor di un otro profeta, saserdote, iglesia òf “obispu”. E no tabata un líder religioso ligá ni ku tèmpel ni ku palasio di rei. E tabata un profeta laiko. Tambe el a agregá “ni mi no ta yu di profeta”. Amos no tabatin oportunitat di bai skol di Beibel, manera e skol di profetanan di Samuel, Elias i Eliseo (2 Reinan 2:5,7, èts).

El a laga sa, “mi ta wardadó di bestia (mira 1:1 tambe) i un plantadó di palu di figo”. No tin duda ku Amos tabatin bon konosementu di krio di bestia, agrikultura, èts. El a referí na esakinan ku frekuensia a den su buki (1:2; 2:13; 3:4-5,8,12; 4:7; 6:12; 7:1; 8:1; 9:6). Siertu palu a produsí un sap ora kunukeronan a kòrt’é na e tempu apropiá. E sap ta bira duru i pobernan a kom’é manera un fruta. Kunukeronan tambe a kòrta figonan kuater dia promé ku kosecha pa nan hecha mas lihe. I si Amos a bende e lana di su karnénan, e por a hasi biahenan na Israel i ku su mes wowonan a mira e dekadensia religioso i sosial na e pais aki.

Amos tabata un hòMBER ku konvikshonnan firme, boluntat fuerte, ku wesu di lomba di stal. Ku kurashi el a bai na Bèt-èl, sentro di idolotria (Amos 7:13) pa denunciá nan piká! Asta e líder máksimo di e religion di Samaria no por a kit’é di su tarea (Amos 7:10-17).

Dios a yama Amos mientras e tabata kuida su karnénan (Amos 7:15). Ma ora Dios a yam’é, el a bandoná su kas na Juda, i komo un laiko a bai proklamá Dios Su mensahe na e hendenan hostile i orguyoso na Israel, sin outorisashon “eklesiastiko”. Esaki ta kòrda nos di e yamada di David mientras e tabata kuida karné (1 Samuel 16:11-13) i Gideon mientras e tabata bati trigu (Huesnan 6:11-14).

Amos tabata un kampsino rústiko—un kampsino—ku a bai prediká pa rikunan. Ripará ku kurashi el a bai na e “santuario di rei i un kas real” (7:13).

Nos por siña diferente lès for di 7:14-15:

1. Dios por usa kualke persona ku ta disponibel p’E.

Amos no tabatin e preparashon usual pa sirbi Señor. E no a studia na skol di Beibel òf seminario. E kos importante tabata ku e tabata disponibel pa Dios! Dios por usa un persona asina.

Esaki ta un enkurashamentu awendia pa miles di kreyente ku no tin edukashon akadémiko òf teológiko. Normal edukashon na un skol di Beibel òf seminario ta un rekisito pa prepará pa sirbi Señor. Di bèrdat, edukashon bíbliko asina ta masha importante. Ma di otro banda, nos semper mester kòrda ku Dios ta soberano den Su eskoho di Su sirbidónan. I tin ora Dios ta yama un persona ku no tabatin oportunitat pa sigui estudionan asina!

Nota tambe ku Dios a yama un persona ku tabatin un ofishi umilde. Bo rango sosial no ta prevení Dios di usábo pa Su gloria. Si Dios yamabo, sea disponibel!

Di otro banda, no rechasá trabou “sekular” komo trabou “no-spiritual”. Tin bes

kreyentenan ku ta graduá di skol di Beibel tin un mentalidat tan orguyoso ku nan ta despueto solamente pa hasi trabou “spiritual.” Tristu! Amos tabata hasi trabou umilde ora Dios a yam’ é.

2. Dios ta skohe hende ku ta aktivo.

Tin kreyente ta sinta ketu wardando pa Dios “yama” nan. Nan no ta sirbi Señor pasobra Dios no a “yama” nan ainda. No sinta pornada warda pa Dios revelá kiko E ke pa bo hasi. Meskos ku ta impusíbel pa stür un outo ku ta stashoná (maske kuantu bo ta bira e stürwil), igualmente, Dios no ta guiábo si bo ta sinta ketu warda pa E dirigíbo den e kaminda ku E ke pa bo bai. Sea aktivo, sirbiendo Señor awor!

3. Dios ta duna siguransa ku E ta mandábo

Amos no tabatin duda ku *Dios* a yam’ é i mand’ é! (Den 7:15-17 el a enfatisá “SEÑOR” kuater biaha.) Ta masha importante pa e sirbidó di Señor ta sigur ku *Dios* ta mand’ é. Ora e tin ku enfrentá oposishon i tempunan deskurashante manera Amos, sabiendo ku *Dios* a mand’ é, ta duna e hòmer di Dios e abilidad pa papia ku umildat i outoridat.

II. LEKTORNAN DI E BUKI

Israel tabata na tòp di su poder politiko i ekonómiko. No tabatin menasa di guera. Ma tòg e nashon tabata na punta di disaster. Dentro di kuater dékada, Dios lo destruí Israel (722-721 B.C.). E buki tabata skirbí prinsipalmente pa e pueblo di Israel. Maske esei tabata e kaso, tòg por bisa ku siertu parti di Amos su mensahe tambe tabata dirigí pa Juda (2:4; 3:1).

III. FECHA DI E BUKI

Amos mes a duna siertu indikashon di e fecha di su ministerio.

A. REINADO DI REINAN

Amos a laga sa ku el a skirbi “*den e tempu di Uzias, rei di Juda, i den e tempu di Jeroboam, yu hòmer di Joas, rei di Israel*” (1:1). Reinado di Uzias, rei di Juda, a dura di 792 te 740 B.C. Rei di Israel, Jeroboam II, a reina di 793 te 753 B.C. Maske Amos su ministerio tabata durante e reinanonan ei, e tòg por a skirbi su buki despues.

B. TEMBLOR

Amos tambe a indiká ku el a mira e vishonnan “dos aña promé ku e temblor” (1:1). Esaki ta duna un indikashon basta eksakto di e fecha. Tabatin un temblor asina severo durante reinado di Uzias ku desendientenan dos shen aña despues ainda a keda impreshoná. Zakarias a skirbi “meskos ku boso a hui pa e temblor den e dianan di Uzias, rei di Juda” (14:5). Ma lastimamente, nos no sa fecha di e temblor. E implikashon di 1:1 ta ku e buki di Amos no a wòrdu skirbí te sikiera 2 aña despues ku Amos a deklará su mensahe na un forma verbal.

Ma e fecha di Amos su ministerio no ta determiná konklusivamente e fecha ku su buki a wòrdu skirbí. Ta lógiko pa dedusí ku Amos lo a skirbi e buki despues di su viahe pa Bèt-èl, ora el a regresá bèk na su kas na Tekoa. Pusíbelmente por bisa ku Amos su ministerio ta fechá durante e dies aña entre 765 i 755 B.C. Si esei ta e kaso, Amos lo a skirbi su buki mas òf ménos na aña 760 B.C.

Beibel no ta indiká e largura di Amos su ministerio, sea ku el a profetisá pa algun siman, luna òf algun aña. Otro profetanen a profetisá den e añanan nèt promé òf despues di Amos. Ma ta pusíbel ku e tabata e úniko profeta di su era.

| PROFETANAN DI ISRAEL | PROFETANAN DI JUDA |
|---|-------------------------------|
| Jonas – 783-773 B.C. Amos – 767-755 B.C. | Abdias Joel – 835-812 B.C. |

IV. PROPOSITO PA E BUKI

Manera otro profetanán, Amos a enfatisá e sierto bèrdatan: e piká di e pueblo, huisio binidero, e rektitut i santidat di Dios, e miserikòrdia di Dios, ofresiendo liberashon. Ma laga nos ta mas spesífiko kiko su proposito di skirbi tabata. Amos a skirbi:

A. PA AVISÁ E PUEBLO DI ISRAEL KU HUISIO TA BIN PA MOTIBU DI NAN PIKÁ

- 1:1 – 9:10

Jeroboam II su reinado tabata briyante. El a gosa eksito militar. Fronteranan di Israel a ekspandé, yegando bèk na loke nan tabata ora a bin e separashon inisial entre Juda i Israel na aña 931 B.C. Israel a bira riku tantu komo resultado di su konkístanan i komo resultado di komersio ku a resultá for di su bon relashon ku Damasko i otro nashonnan.

Ma e prosperidat tabatin un afekto negativo tremendo riba e hendenan di Israel. Nan a bira materialista i a kudishá, gosando tur klase di lúho. E rikunan a bira mas riku, ignorando e derechunan di e pobernan. Inmoralidat tabata kibra famianan. Maske Israel a kumpli ku e ritonan religioso ku Dios a ordená, nan kurason tabata leu di djE (5:21-24).

Amos a aparesé diripiente riba e pantaya na Bèt-èl. El a eksponé nan pikánan manera idolatria, egoísmo, buracheria, opreshon, ekstorsion, korupshon, inhustisia, materialismo, ès. (2:6-8). I komo resultado di nan piká, el a anunsiá ku e huisio di Dios ta inevitabel!

E sekshon prinsipal di e buki (1:1-9:10) ta presentá Dios komo mandatario di henter mundu, i ta deklará ku tur nashon tin ku duna kuenta n'E. Amos a enfatisá nan deber pa kumpli ku e eksigensianan di Dios Su lei, tantu ku echunan komo di kurason. Pasobra esei no tabata sosodé, Dios lo huzga.

B. PA LAGA ISRAEL SA KU DIOS TA KLA PA LIBRA - 9:11-15

Den e ultimo sekshon di e buki, Amos a papia di Dios Su bendishon despues di huisio. El a laga sa ku maske pueblo di Dios tabata infiel, Señor ta keda fiel. Esei ta kòrda nos di 2 Timoteo 2:13 ku ta bisa, “si nos ta infiel, E ta keda fiel, pasobra E no por nenga Su mes”.

V. STRUKTURA I KONTENIDO DI E BUKI

No lubidá ku e mensahe di Amos a wòrdu proklamá *promé* ku Amos a skirbié. Amos lo mester tabatin hopi kurashi pa bai proklamá un mensahe tan severo, di kastigu divino kontra Israel! E hendenan lo no tabata ke skucha...i kisas nan lo tabata ke mat'él!

Ripará kon Amos a hinka su mensahe den otro. El a organis'é di tal forma pa kapta nan atenshon!

I. 8 DENUNSAIA – 1-2

Kada denuncia ta kuminsá: “Pa 3 transgreshon...sí, pa 4”. Esaki ta komuniká ku nan piká ta hopi, ta kontino, ta demasiado. Ta un ekspreshon ku ta nifiká “awor si ta basta”. Dios a soportá nan piká ún, dos, tres biaha. Ma awor ta di mas...E lo kastigá sigur sigur! Nota tambe ku e kastigu ta deskribí na un forma simbóliko komo “kandela” (1:4,7,10,12,14; 2:2,5).

A. Denunsia di Siria - 1:3-5

B. Denunsia di Filistia - 1:6-8

C. Denunsia di Finisia - 1:9-10

D. Denunsia di Edòm - 1:11-12

E. Denunsia di Amon - 1:13-15

F. Denunsia di Moab - 2:1-3

G. Denunsia di Juda - 2:4,5

H. Denunsia di Israel 2:6-16

Paga bon tino na e táktika ku Amos a usa. El a kuminsá dor di denunsiá Siria, Filistia i Finisia, nashonnan ku tabata pagano pagano. E hendenan di Israel lo tabata kontentu pa tende e denunsianan aki. E pueblo di Israel tabata di akuerdo ku nan ta meresé Dios Su kastigu. Despues el a kondená Edom, Amon i Moab. Esakinan tabata nashonnan pagano ku tòg tabata famia di Israel. (Edom ta desendientenan di Esau. Amon i Moab ta desendientenan di Lòt.) Atrobe e multitut lo a skucha e denunsianan ku smak. Amos tabata nan oradó favorito. Asta ora Amos a denunsiá Juda, un di e tribunan di Israel, ketu bai e hendenan di Israel lo a aploudié.

Anto Amos a laga e “bòm” kai, denunsiando Israel mes, mustrandu ku Israel ta kulpabel i ta meresé Dios Su kastigu! Awor diripiente Amos lo a bira nan enemigu!

Hasiendo uso di e táktika aki, Amos a mostra ku Dios ta imparsial. El a huzga Israel ku e mesun midi ku el a huzga otro nashonnan. I ta sali na kla ku Israel ta meresé kastigu meskos ku e otro nashonnan.

II. 3 SERMON - 3-6

Talbes, loke e buki di Amos ta kontené ta un resumen kortiku di Amos su sermon. De todo kaso, kada sermon di Amos a kuminsa ku “tende” òf “skucha e palabra aki” (3:1; 4:1; 5:1). I kada sermon ta dividí na dos parti dor e palabra “pesei” (3:11; 4:12; 5:16). Promé ku e “pesei”, Amos a mostra dikon nan ta meresé huisio. I despues di e “pesei”, Amos a laga sa ku Dios a fiha e huisio kaba, pasobra nan ta meres’é! I por nota tambe ku kada sermon ta bira mas severo. Nota tambe ku Amos ta mensioná diferente piká na un forma hopi spesífiko.

A. Sermon #1 - 3:1-15

Enfasis: Israel su kulpabilidad den presente

1. Huisio Meresí - 3:1-10

Segun 3:2, Dios a bisa, “Ta boso so Mi a skohe for di entre tur e famianan di tera; pesei lo Mi kastigá boso pa tur boso inikidatnan”. Talbes esaki ta e teksto klave di Amos. Dios a duna Israel hopi privilegio. Komo resultado nan kastigu lo ta mas severo.

2. Huisio Fihá - 3:11-15

Nota e *prinsipio* di huisio divino (3:2). Esaki (3:2) ta un teksto klave den buki di Amos. E buki di Amos ta enfatisá ku Dios lo huzga pasobra Israel a abusá nan privilegionan. Dios semper ta huzga segun e privilegio ku bo tin. Den bista di Dios, mas privilegio ta oumentá e responsabilidat...i pues mas kastigu! Israel tabatin hopi privilegio, p’esei su kastigu lo ta mas severo.

B. Sermon #2 - 4:1-13

Enfasis: Israel su piká den *pasado*

1. Huisio Meresí - 4:1-11

2. Huisio Fihá - 4:12,13

Nota e *pasenshi* di huisio divino. Segun 4:6-11, Dios a manda vários kastigu chikitu pa pa spierta Israel:

a. Hamber - 4:6

b. Sekura - 4:7-8

c. Pèst - 4:9

d. Plaga - 4:10

e. Destrukshon - 4:11

Apesar di esei, nan a ignorá e kastigunan i “no a bolbe serka Mi” (4:6,8,9,10,11). Pesei nan lo eksperensiá *kastigu severo* (4:12). Talbes nos ta kritiká Israel. Ma kuantu biaha kreyentenan awendia por ta mes kabesura?

C. Sermon #3 - 5:1-6:14

Enfasis: Israel su kastigu pa piká den *futuro*

1. Huisio Meresí - 5:1-15

2. Huisio Fihá - 5:16-6:14

Nota e *severidat* di huisio dibino (5:2,3; 6:8-14). Nota tambe ku e sermon aki ta mas largu ku e otro sermonnan. Su kontenido ta kubri kapítulonon sinku i seis. E ta mas largu pasobra Amos a agregá dos “*ai*” (5:18; 6:1).

III. 5 VISHON - 7-9

E sekshon aki ta kontenté sinku vishon. Kada vishon ta mas severo:

A. Vishon di e Plaga di Dalakochi - 7:1-3

Amos a hasi orashon i e *huisio a wòrdu evitá*

B. Vishon di e Kandela Teribel - 7:4-6

Kòrda ku kandela ta simbóliko pa Dios Su huisio. Amos ta hasi orashon i e *huisio a wòrdu prevení*.

C. Vishon di Chumbu di Midi - 7:7-9

Ma e biaha aki *huisio ta wòrdu fihá*.

Un chumbu di midi ta mostra kon stret òf kon dwars un muraya ta. Palabra di Dios ta nos chumbu di midi. Ora bo ta hiba un bida dwars segun Dios Su stèndèrt hustu, lo bo sufri e konsekuensianan. Kon strèt bo bida ta kompará kun'é?

E úniko sekshon di narashon den e buki ta 7:10-17. Esaki ta un sekshon biografiko.

D. Vishon di Makutu ku Fruta Hechu - 8:1-14

Na paisnan unda ta hasi kalor, ora fruta ta hecha mester kita nan mes ora òf nan ta kuminsá putri na e palu mes. Esaki ta un mensahe di *huisio pendiente*.

Talbes por bisa ku 8:1-3 ta e vishon di e makutu ku fruta hechu i 8:4-14 ta un otro mensahe profétiko.

E. Vishon di Dios Pará Banda di Altar - 9:1-10

E altar mensioná aki ta e altar na Bèt-èl pa adorá dios falsu. Dios ta basha Su rabia awor! *Huisio ehekutá* ta e mensahe aki.

E buki ta konkluí ku Dios Su promesa di restorashon pa ku Israel den futuro (9:8-15). E sekshon aki ta enkurashá esnan ku ta biba konforme ku Palabra di Dios, sigurando nan ku e huisio di Dios no ta e kos final. Dios *lo* kòrda Su aliansa ku Israel i lo restorá nan.

VI. OPSERVASHONAN DI E BUKI

Mayoria profeta di Tèstament Bieu a proklamá un mensahe di huisio—un mensahe hopi duru. Ma ningun profeta a kondená piká i papia di huisio asina fuerte ku e profeta Amos.

Su manera di ekspresá su mes tabata bòt, skèrpi, dirèkt, franko. E no a refiná su palabranan. El a bisa e kos manera e ta! El a denunciá piká den nan kara, no tras di nan lomba.

E mensahe ku Dios a duna Amos pa komuniká tabata un mensahe duru i severo. Pesei El a skohe un mensahero ku tabata un hòmber duru i a hiba un bida disipliná. Su manera di prediká i skirbi tabata stail di kampesino. Probabelmente Amos a konosé un bida di peliger i pobresa den e tera seku rònt di Tekoa. El a biba den un mundu bashí i silensioso. Asta su manera di bisti lo tabata stail di un kampesino atrasá. Ma Amos a konosé Dios, i su bida na Tekoa tabata nèt e preparashon ku e tabatin mester pa su tarea.

Amos a aktua i papia ku kurashi. El a teme Dios asina tantu ku el a teme ningun otro persona. Su palabranan tabata palabranan di un persona di integridat i konvikshonnan firme. El a bai na e sentro di religion falsu, Bèt-el, i a denunciá nan piká den nan kara. El a kondená nan religiosidat, un religiosidat sin santidat...loke ta igulá hipokrisia. Promé ku el a klousurá su mensahe, el a denunciá tantu hudiu komo pagano, tantu lídernan komo puebel. El a denunciá opresornan riku, sea ta damanan riku (yamando nan “bakanan” – 4:4), komersiantenan desonesto, mandatarionan korupto, huesnan oportunistas, saserdotenan falsu (4:1; 6:1,4; 7:8-9). Su predikashi

tabata asina skèrpi ku Amasias (saserdote di e religion falsu di Israel) a akus'é di instigá rebeldia i a bis'é pa regresá na su mes pais (7:10-17).

Ma maske su forma di komuniká tabata asina skèrpi, Amos no a hasié ku orguyo. El a demonstrá umildat, atmitiendo ku e ta simpelmente un kapesino.

Tin hende ta kritiká buki di Amos komo un “bukí negativo”. Ma Amos su proposito prinsipal ta pa konvensé hende di piká i trese nan na repentimentu genuino. E no a prediká asina pa satesfasé su propio inkietutnan. El a prediká di e forma aki pa nan regresá na Dios: “BuskáMi pa boso por biba” (5:4).

Den e buki, Amos a hasi un súprika na fabor di e pobernan, hende ku nesesidat, hende ku ménos rekursu i oportunitat (2:6-7; 4:1; 5:11-12; 8:4,6). Komo resultado, algun estudiante di Beibel ta haña ku Amos ta Dios Su vosero pa huisio sosial. Echu ta ku Amos ta haña ku un bida hustu mester kompañá doktrina korekto. No ta basta pa bo ta un hende religioso. E bida tambe mester demonstrá esei (Santiago 1:26-2:1).

Literatura Konsultá

Archer, Gleason L. Jr., *A Survey of the Old Testament Introduction* (Chicago: Moody Press, 1985), p. 323-327.

Baxter, J. Sidlow, *Explore the Book* (Grand Rapids: Zondervan Publishing House, 1960), vol. 4, p. 125-133.

Demaray, Donald E., *A Layman's Guide to Our Bible* (Los Angeles: Cowman Publishing Company, 1964), p. 111-112.

Douglas, Alban, *Old Testament Survey* anotashon di lèsnan na Prairie Bible Institute (Three Hills, 1983), p. 91.

Hill, Andrew E. & Walton, John H., *A Survey of the Old Testament* (Grand Rapids: Zondervan Publishing House, 1991), p. 370-376.

Jensen, Irving L., *Jensen's Survey of the Old Testament* (Chicago: Moody Bible Institute, 1978), p. 402-411.

Mears, Henrietta C., *What the Bible is All About* (Minneapolis: World Wide Publications, 1966), p. 287-295.

McGee, J. Vernon, *Thru the Bible* notes, p. 269-270.

Miller, Adam W., *Brief Introduction to the Old Testament* (Anderson, Indiana, Warner Press, 1964), p. 94-99.

Wiersbe, Warren W., *Expository Outlines on the Old Testament*, (Convington, Kentucky: Calvary Baptist Church, March 1973).